



## Terenga 2: Hōtaka 06 – He pātai

Māhina mai ana ngā whetū o te rangi e tuku iho nei i te aho ariari ki runga ki te hunga ngākaunui ki te reo Māori. Ko te manako ka pūrangiaho te kitea o te huarahi o AKO hei pūtahitanga mō ō tātou awhero kia ora te reo ki tua o ake, ake.

### Hei Mahi Whakarongo

He tino taonga te waka hourua o ngā tūpuna. Koinā i tae mai ai tātou ki konei i te hekenga nui. I tata ngaro te hunga e mōhio nei ki te whakaterere waka ki runga moana. Me i kore ake te momo i a Papa Mau, te tohunga waka o te Moana nui a Kiwa e ora tonu nei ēnei mātauranga. Ko Hekenukumai Busby tētehi o ngā tohunga whakaterere waka o te ao Māori. Kia tahuri atu tātou ki te whakarongo ki a ia me ōna whakaaro e pā ana ki tēnei kaupapa.

1. He aha te pānga o Kupe ki tā Hekenuku whai i tēnei mahi?
2. Ko hea te wāhi nei, a Maupiti, ki ō whakaaro?
3. Kua tae te koroua ki reira?

Whakarongo ki ngā whakautu a ngā ākongā o AKO.

### He Whakamārama

Hei whakawhānui ake i te pātai mō te take i hua ai tētehi āhuatanga, anei ngā whakatakotoranga e toru mō ngā wā rerekē e toru.

(wā kua hipa) He aha rātou i kōrero pērā ai?  
*Why did they talk like that?*

(wā o nāianeī) He aha koe e tangi nei? / He aha te pēpē e tangi ai?  
*Why are you crying? / Why do babies cry?*

(wā kei te heke) He aha te pahi e tū ai ki reira?  
*Why will the bust stop there?*

### Hei Manatu

I ahu mai i whea ētehi o ngā kupu hou e pāraweranuitia ana te rangona i ēnei wā? Whakarongo ki te mātāpuna o ētehi o ngā kupu i puta i Te Taura Whiri i te Reo Māori i ngā tau ki muri. Ko te kupu o te rā nei e hāngai ana ki te whare mīere i Pōneke - 'tōrangapū'.

### Hei Mahi

Whiriwhiriha te mutunga e hāngai ana ki te tīmatanga.

- |                         |                         |
|-------------------------|-------------------------|
| 1. He aha rawa          | a. pōhara tonu nei?     |
| 2. Me pēhea tātou e     | e. rātou i pērā ai?     |
| 3. Nā te aha koe        | i. tātou mahi ngātahi?  |
| 4. He aha te iwi e noho | o. mōhio ai ki tēnā?    |
| 5. Me pēhea tā          | u. i kore ai e tae mai? |

**Whakautu:**

1. e 2. o 3. u 4. a 5. i